



SAUNOAGA AUTU
AFIOGA TAMAITAI PALEMIA
TATALAINA ALOAIA O LE MALAE-VAALELE FAAITULAGI
A LE PASEFIKA I FALEOLO
Aso Tofi 17 Oketopa 2024 – 5.00pm

Lau Susuga i le Taitai o le Sauniga – Susuga Faavae Sooalo o le Sea foi o le Sinoti a Upolu i Sisifo,
Afifio Minisita o le Kapeneta faapea Minisita Lagolago ma Sui Mamalu o le Palemene o Samoa,
Sui o Malo mai Fafo,
Afio lau Afioaga i le Taitaifono ma le Komiti Faatonu o le Pulega o Malae Vaalele,
Afifio Fa’auluuluga o Matagaluega ma Faalapotopotoga Eseese a le Malo,
Afifio Pule Sili ma Sui o Kamupani Eseese, Pa’aga ma Uō a le Pulega o Malaevaalele.
Le paia maualuga o le Atunuu ua ofaga potopoto i le Malae Vaalele i Faleolo nei.

O lea ua mae’a momoli la tatou taulaga sii i luma o le Atua e pei ona tapena i ai le susuga i le Taitai o le Sauniga lau susuga le Sea, e sula ai le alofa ma le agaglelei o lo tatou Tapaau Sili i le lagi ona ua tatou aulia mai lenei matagofie aemaise le lafo a Lualemana sa lupe aua le tatalaina o lenei atina’e taua a lo tatou Malo.

E momoli atu ai le faafetai i lau susuga mo le upu folafola e laēi ai fuafuaga ma le faamoemoe o lenei aso, tau ina tului pea lou soifua faa-le-Atua aua le feagai ai ma le galuega.

PAIA

O lea e maitau atu o loo faalepa le Saofaiga i le Aufaigaluega Paia a le Atua.

Ua nofoia foi le mamalu ma le paia o le Aiga Kapeneta, Afifio foile maave eseese o Samoa i ou tulaga faalupe, Susu Faauluuluga o Matagaluega ma Faalapotopotoga Tumaoti a le Malo, aemaise o Kamupani ma Paaga a le Malo. Tainane le loaloa o le auvalaaulia.

E faatalofa atu foi i le tatou Afioaga nei o Satapuala, E Afio ai Toalepaialii o le Sa'oalii faapea Satuala, Lau fetalaiga Vaili o le laau na fausia ma le mamalu i le Falea'ana. Tulouna lava

O paia ma mamalu na ua agatonu ai la tatou fesilafaiga i lenei afiafi. Aua ua taoto tofiga ma mea na tutupu i le lagi-soifua, o e na latou asaina le vaofilifili a o se sailiga Malo foi aua Samoa.

TALA TUU FAATASI O LE GALUEGA

Fale Faatali/Faae'e Vaalele Laiti- Regional Airport Terminal & Apron

E pei ona faailoa i le Tatalaina o lenei galuega, o lenei Fale fou faatasi ai ma le Nofoaga e Paka ai Vaalele Laiti (Apron). O Vaalele e malaga mai i atunuu o le Pasefika, Toga, Fiti, Tuvalu, Niue, Atu Kuki ma tatou i Samoa nei (Maota ma Asau), lea o le a tua mai iai le Fale Autu (Main Terminal) aemaise Vaalele taunuu mo le Fono a Taitai o Malo o le Taupulega (CHOGM).

O lenei galuega taua na faamae'aina ia Setema 2024, ma o lona tau aofai e pei ona faailoa i le taimi na tatala ai le amatalia o le galuega e WS\$25 miliona.

E momoli ai le faafetai i Kamupani sa gafa ma lenei galuega fita, aemaise le Pulega mo le tautua matavela ma le filigā ia tini lau o le faamoemoe, auā lava le manuia laulete o tagatanuu o Samoa.

Malo le loto toa, faafetai i le utaga fetuutuunai, ua taunuu nei fuafuaga tāua.

O atina'e nei mo si o tatou atunuu e faailoa ai le ola finau, le agaga atia'e, faaaoga avanoa mo le atina'eina o aiga, nuu, ekalesia ma le atunu'u.

O se mitamitaga sili lea, lo tatou saili malo mo se lumanai manuia. O faamanuiaga uma nei e mo le filifiliga saoloto o tagatanuu uma o Samoa ina ia maua le soifua manuia ma ola maloloina.

Ia auomanū lenei aso i le alofa o le Atua pulepule tetele.

Soifua ma ia Manuia.